

ՍԱՐԴԱՐԱՊԱՏԸ՝ ՆՈՐ ԱՆՈՒՆՆԵՐՈՎ

Մայիսի 28-ի առավոտյան, Հայաստանի Առաջին Հանրապետության (1918թ.) 78-րդ տարեդարձի առիթով, Սուրբ Էջմիածնի Մայր Տաճարում, առավոտյան ժամերգությունից հետո, Ամենայն Հայոց Կաթողիկոս Գարեգին Վեհափառը հետևյալ խոսքն ուղղեց Մայր Աթոռի միաբանությանն ու Հոգևոր Ժեմարանի սաներին և ներկա եպատացյալներին:

Սիրելի միաբանակից եղբայրներ, սաներ և հավատացյալներ,

Երկու օր առաջ, կիրակի, հանդիսավոր կերպով և պաշտոնական հանգամանքով, մեր Մայր Տաճարում կատարվեց հոգեհանգստյան արարողություն 1918 թ. Սարդարապատում, Բաշ Ապարանում, Ղարաքիլիսայում և այլ վայրերում հայ ժողովրդի գոյամարտի օրհասական այդ օրերին իրենց կյանքը Հայրենիքի և ազգի ազատությանն ընծայաբերած հերոսների հոգիների խաղաղության համար: Հարգանք ընծայվեց 1918 թ. անկախությունը կերտողների հիշատակին, ապա գոհաբանական աղոթք մատուցվեց մեր Հայրենիքի նոր և անկախ պետության (1991 Սեպտեմբեր 21) ամրացման, գորացման և հառաջդիմության համար:

Այսօր, Մայիս 28-ի այս առավոտում, երբ հավաքվել ենք Մայր Տաճարի այս սրբաճաճանչ կամարների ներքո, աղոթքի այս պահին, ես ցանկանում եմ վերակոչել բոլոր ճախատակների և անկախությունը կերտող անձերի անմեռ ոգին և անթառամելի կտակը մեզ՝ ապրողներին, և հատկապես, մեզ՝ եկեղեցու սպասավորներին:

Մենք չենք կարող մոռանալ, որ 1918 թ. անկախությունը օրհնվել և նվիրագործվել է Մայր Աթոռ Սուրբ Էջմիածնում Հայրապետական օրհնությանմբը Հայոց դրոշին և քանակին, Գեորգ Ե Կաթողիկոսի կողմից: Մենք չենք կարող մոռանալ, որ այս Աթոռի ամեննն նվիրյալ և գիտնական դեմքերից Գարեգին Հովսեփյան եպիսկոպոսը խաչն ի ձեռին եղել է Սարդարապատում, կանգնել է կողքին հայ մարտիկների և անդապնդել նրանց քաջությունը իր հավատարմարժ խոսքերով:

Աստված ինձ բախտավոր երջանկություն է տվել, որ ես անձամբ ճանաչել եմ այդ Հանրապետությունը կերտող և նրան ծառայած անձերից ոմանց՝ ինչպես Գարեգին Կաթողիկոս Հովսեփյանին, Նիկոլ Աղբալյանին, Լևոն Ծանթին, Սիմոն Վրացյանին և ուրիշներին: Իմ ակամջներում երբեք չի լռի կենդանի ձայնը մանավանդ Գարեգին Հովսեփյանի և քաբախում վկայությունները հայոց անկախության մյուս ճարտարապետների, որոնք Հայրենիքի մասին երբեք չէին խոսում որպես մի տեսակ գաղափարի, այլ իրենց ողջ գոյությանը հետ միաշաղախված էին զգում Հայրենիքը նրա կազմավորիչ բոլոր տարրերով:

Զգում եմ, որ այս պահին, Միածնաէջ այս խորանին առաջ, նրանց հոգիները երկնային երանական խաղաղության կայքերից հրճվում են գերազանց բերկրանքով ի տես իրենց գոյության հետ անքակտելիորեն տարրացած և իրենց կյանքովը պաշտված Հայրենիքի նոր, անկախ Հանրապետության ստեղծումովը և ազատության շունչի տարածումովը մեր Հայրենի աշխարհում:

Սարդարապատի հերոսների համար այսօր մեքերում եմ ձեզ, որպես ողեգին ձեր մտածման և կյանքի, մեր ժամագրքում զինվորաց նվիրված ժամանուտ-աղոթքից հետևյալ բառերը. «Դուք, ձեր մարմինները փոխանակեցիք որպես փրկագին ձեր հոգիներին»: Այո՛, նրանք իրենց մարմինները զոհաբերեցին ոչ թե սուս հողի համար՝ հողեղեն արժեքով չափված և կշռված մի պատառ հողի համար, այլ Հայրենիքի՝ համար, այսինքն՝ իմաստավորված և հոգևորված հողին և հոգևոր ներգործությամբ խորհրդանշված և արժևորված մարդկային և ազգային սկզբունքների՝ արժանապատվության և ազատության համար:

**

Ի՞նչ ենք մենք տալիս մեզանից այսօր:

Սարդարապատ բառը այսօրվա մեր կյանքի բառարանում զգեցել է ուրիշ անուններ՝ Արցախ և Պետականությանը օժտված Հայրենիքի վերաշինություն:

Այսօր Արցախի հողը և ժողովուրդը նույնքան նվիրական են մեզ համար, որքան Սարդարապատը: Ազատ և անկախ ապրելու նույն կամքն է, որ այսօր շքեղորեն դրսևորվում է Արցախի մեր հերոսական ժողովրդի կյանքում, ինչպես նաև բոլոր այն հայերի կյանքում լինի Մայր Հայրենիքում կամ արտասահմանում, որոնց մեջ Արցախն է ապրում իբրև նվիրական պարտականություն: Այդ ժողովրդի կամքն է, որ պետք է դառնա մեր բոլորի հրամայականը այս օրերին:

Հայրենիքի անկախություն ունենալը գեղեցիկ է և պատվաբեր, բայց գեղեցկից ու պատվաքերից գեղեցկագույն և պատվականագույն են այդ անկախ Հայրենիքը պահպանելու, գորացնելու և զարգացնելու կամքը, նվիրումը և զոհաբերությունը:

Սարդարապատ բառը ուրիշ մեկ անուն ևս ունի այսօր: Դա մեր արտասահմանի հայ ժողովուրդի հայակերտման գործի ուժեղացումն է, որովհետև այդ հայությունն էլ մաս կկազմի մեր Հայրենիքի ամբողջությամբ: Ես լավ եմ իմանում, թե ի՞նչ հերոսական ճիգ է պահանջվում արտասահմանյան երկրներում, օտար մշակույթների ոլորտներում, ոչ թե միայն հայ մնալը, այլ հայորեն ապրելը Հայ Եկեղեցու հավատքով, հայ լեզվի մշակումով և Հայրենիքի անսասանության և հավերժության գաղափարով:

**

Սիրելի՛ք,

Ավետարանում մի սքանչելի դրվագ կա, որ իմ սրտին համար հատուկ գրավչություն ունի: Դա այն պահն է, երբ Հիսուս կանգնած Երուսաղեմի տաճարի առաջ դիտում էր, թե ինչպե՛ս երբայեցի ժողովրդի զավակները

գալիս էին տաճար, որի մուտքին գետեղված էին զանձանակներ և որոնց մեջ ամեն մի անձ, որ տաճար էր մտնում, իր ընծան էր գցում: Շատերն անցան և շատ գումարներ դրեցին զանձանակի մեջ: Նրանց շարքում անցավ մի այրի կին՝ աղքատ, որ երկու լումա դրեց զանձանակի մեջ: Հանկարծ Հիսուս իր առաքյալներին իր մոտ կանչեց և ասաց. «Այդ այրի կինը ավելի տվեց, քան բոլոր մյուսները, որովհետև նա տվեց, ինչ որ ուներ իր ապրուստի համար»։ Որովհետև մյուսները տվեցին իրենց ավելորդից, իսկ նա տվեց, ինչ որ ուներ...

Մեր բոլորի առաջ և բոլոր դարերում և բոլոր վայրերում մի զանձանակ կա գետեղված: Ռ-րա անունն է պատմություն՝ հավաքական կյանքի կենդանի և հավերժորեն բաց զանձանակ: Նրա առջևից են անցել մեր հայրերը և դրել են այն, ինչ որ մենք կոչում ենք հայրերի ժառանգություն՝ իր հոգևոր, ազգային, մշակութային, քաղաքական բաղկացուցիչ տարրերով: Լուսավորիչն իր արցունքն է դրել որպես անսպառելի յուղ մեր հավատքի ամուր ճրագին, Մեսրոպ Մաշտոցն իր գիրն է դրել որպես մեր ինքնության դիմագիծ, Եզնիկն իր միտքն է դրել որպես կյանքի փիլիսոփայություն, Վարդանն իր սուրն է դրել որպես խորհրդանիշ հայրենապաշտության և եկեղեցապաշտպանության, Նարեկացին իր աղոթքն է դրել որպես հոգու սնուցման անմահացուցիչ կերակուր, Օնորհային իր «Շարականն» է դրել որպես հայ հոգու ցվագեղություն, Տաթևացին իր գրքերն է դրել որպես նախանշախնդրության վկայություն, հերոսներն ու նահատակները իրենց արյունն են դրել, հայ ծողկները իրենց զավակների սերն են դրել որպես կյանքի հաղթանակի ուժ:

Այսօր մենք՝ ապրողներս ենք անցնում այդ զանձանակի առաջից. ի՞նչ ենք դնում մենք: Ես հավատում եմ, որ մենք կոչվել ենք դնելու ոչ թե մեկ-վանից մի բան, այլ՝ մենք զմեզ՝ որպես եկեղեցու սպասավորներ՝ Մայր Աթոռի ցվիրյալ միաբաններ: Մենք կոչվել ենք այսօր մեր ամբողջական և անվերապա բաժինը բերելու մեր պատմության զանձանակին, մեր Հայրենիքի վերակերտումի հարածուն գնացքին: Հոգևոր և բարոյական սկզբունքները Ավետարանի լույսով և Քրիստոսի կնիքով մեր ժողովրդի կյանքի հետ շաղախելու ստիպողական պարտավորության առջև ենք կանգնած:

Սարդարապատը շարունակվում է...

Շարունակվում է նաև մեր բաժինը Սարդարապատյան գոյամարտին և մեր մեր պետության կենսաշինության՝ մեր Հայրենիքում և ողջ աշխարհում:

Լինենք արժանավոր ժառանգորդները և գործուն շարունակողները Սարդարապատյան առաքելության...

ԳԱՐԵԳԻՆ Ա

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

28 Մայիս 1996,

Ս. Էջմիածին
